

# **Kaabke Tshoobkug**

## **Lug Taw Qha**

Ib tsoom ntseeg suavdlawg, peb tub leeg hab coglug tas peb yuav tsi ua tshoobkug le yaav taag lug kws tsi tau ntseeg Vaajtswv, kws tau teev muaj tseg rua huv tswvcuab kev coglug (Membership Covenant) nqai 1 lawm. Yogle ntawd, txij nuav moog, peb yuav siv tug qauv huvqaab nuav lug txis tshoobkug lawm xwb. Txawm peb muaj ntau xeem los peb suavdlawg yog ib tsev tuabneeg ntawm tug Tswv Yexus xwb, yogle ntawd, ca peb tuav lub xeem ca tau sistxis ua txwj ua nkawm hab siszeem ua neej ua tsaav; tabsis ca peb siv tuab txuj kaabke lug txis tshoobkug. Yog leejtwg coj tau zoo tshaaj hab ua tau yoojyim dlua le tsaab kaabke tshoobkug nuav, tug ntawd yimfuab yuav tau Vaajtswv le koobmoov xwb. Ca peb ua rua Vaajtswv tuableeg tau koobmeej yuav zoo dlua le peb ua rua peb tau koobmeej.

## **Phaaj I. Plaub Hom Tshoobkug**

### **A. Hom 1. Tshoob Kev Ntseeg**

1. Rooj tshoob nuav yog xwbfbw hab txwjlaug nruug ob tog namtxiv cev lug. Tug tub hab tug ntxhais yuavtsum yog nraugxwb hab nkaujxwb. Rooj tshoob nuav yuav tsi muaj cov nraag nuav:
  - (i) Phijlaaj hab risnraa, tshwj nam txaisntsuab tsuas yog npaaj ca moog tog nkaujnyaab lug tsev xwb;
  - (ii) Lub kawm su, pob choj, lub kaus, luamyeeb, beer hab cawv ntsim;
  - (iii) Tug sawvcev namtxiv tog vauv moog laav tshoob;
  - (iv) Namtxiv tog ntxhais lub rooj has xwm los yog lub rooj phwbtschoob.
2. Tug qauv txheejtxheem yog le nuav:
  - (i) Ibtug txwjlaug thov namtxiv lub rooj siv;
  - (ii) Thaus tau lub rooj lawm, ob tug txwjlaug moog nqug namtxiv tog ntxhais, namtxiv tog tub, tug ntxhais hab tug tub lug nyob rooj, hab tho puab ib leeg ib poom dlej qaabzib hab has kuas suavdlawg haus uake ib lwm;
  - (iii) Ibtug txwjlaug maamle nug namtxiv ob tog seb puas pumzoo ca tug tub hab tug ntxhais sissau lug ua neej. Yog ob tog namtxiv pumzoo lawm, maamle nug tug ntxhais hab tug tub seb obtug puas tseem zoosab lug ua txwjnkawm lawvle obtug tau coglug lawm. (Nug namtxiv tog ntxhais uantej le nug namtxiv tog tub uaqaab hab nug tug ntxhais uantej le nug tug tub uaqaab). Thaus suavdlawg pumzoo taag

lawm xwbfbw los yog ibtug txwjlaug lug thov Vaajtsv muab puab tej lug fij rua vaajtsv;

- (iv) Thaus thov Vaajtsv taag lawm, ob tog namtxiv hab tug tub tug ntxhais nqeg rooj moog nyob rua ibqho, tsi xob nyob sau rooj lawm;
- (v.) Ob tug cevlug ntawm namtxiv ob tog los yog ob tug txwjlaug maamle lug nyob rooj hab nug tej nqeg tshoob hab kev noj haus moog ntxiv;
- (vi.) Yog namtxiv tog ntxhais pumzoo ca rooj tshoob ua lawvle hom 1 nuav lawm yuav tsi pub kuas namtxiv tog ntxhais ntus tej nyaj ntuag ntxhais hab lwmyaam nyaj lawvle Moob kaabke tshoobkug ruaqhov namtxiv ob tog hab tub ntxhais tub pumzoo taag lawm.

**B. Hom 2. Tshoob tug Pum Tug Qaab**

Hom tshoob nuav, yuav tau muaj mejkoob, phijlaaj, risnraa, nam txaisntsuab, hab tug sawvcev namtxiv tog tub moog laav tshoob. Yog namtxiv tog ntxhais ho xaav kuas has rua qhov yoojyim le cov ntseeg ua xwb, tes cov mejkoob cale ua lawvle cov txheejtxheem ntawm hom 1 sau toj nuav.

**C. Hom 3. Tshoob Zawj (tshoob moog has huv tsev)**

Tshoob zawj kws muaj mejkoob yuav tau muaj cov tub tshoobkug lawvle hom 2 sau toj nuav. Yog yuav ua yoojyim lawvle cov ntseeg ua xwb, tes cale ua lawvle hom 1 sau nuav.

**D. Hom 4. Tshoob Pujnrauj Yawmnrauj, Pujntsuag Yawmntsuag**

Hom nuav, ca tso rua mejkoob has xwb. Yog nkawm namtxiv tshab ntawd xaav ua ib pluag mov noj ua Vaajtsv tsaug hab xaav kuas xwbfbw hab txwjlaug tuaj paab thov Vaajtsv rua obtug lubneej kws lug sissau uake ntawd los tau.

## **Phaaj II. Khoom Siv Rua Tshoobkug**

- A. Yog peb pawgntseeg muaj tub muab nyaab lossis muaj ntxhais qua, tsi has tug tub lossis tug ntxhais kws puavleej yog tswvcuab nyob huv peb pawgntseeg lossis tug ntxhais yog tswvcuab huv peb pawgntseeg hab tug tub yog tug saabnrau; txawm tug tub yog tug ntseeg lossis tsi yog tug ntseeg los tsi pub muaj lub kaus, nruab luamyeeb, hab dlej cawv, tsuas siv dlej qaabzib xwb (saib HKM phoo kaabke rua tshoobkug, nplooj ntawv 41, nqai 3 hab 4).
- B. Yog moog yuav tug saabnrau kws yog dlua lwm pawgntseeg, tug mejkoob kws yuav moog leg rooj tshoob ntawd lossis namtxiv tog tub yuav tau hu moog nrug namtxiv tog ntxhais thaam, tug thawjcoj ntawm namtxiv tog ntxhais thaam, lossis hu rua tug thawjcoj tshoobkug ntawm pawgntseeg ntawd thaam seb puab kaabke txuas tshoobkug yog lecaag tes yoog lawvle qhov kws puab muaj ntawd.

---

***HMONG AMERICAN ALLIANCE CHURCH***

2515 Maplewood Drive, Maplewood, MN 55109

- C. Yog tug tub huv peb pawgntseeg moog yuav ibtug ntxhais kws tsi yog cov ntseeg, namtxiv tog tub yuav tau nrug tug txwjlaug kws saib phaab tshoobkug hab nrug cov mejkoob huv pawg ntseeg saablaaj.
- D. Tsi pub muaj qab suavyaig, qab faibsa, qab npwg poj, qab dlaab, hab npua dlaab; txawmyog muab nyaj ntaus xwb los tsi pub muaj.

### **Phaaj III. Kev Pe**

- A. Peb yog ib tsev tuabneeg ntawm tug Tswv Yexus hab yog tswvcuab rua ib pawgntseeg, thaus muaj kev txis tshoobkug, tsi pub pe. Dlhaule ntawd, peb yog cov ntseeg Vaajtswv, ca peb ua qauv zoo rua tug tsi tau paub Vaajtswv; txawmyog tug vauv yog tug tsi tau ntseeg Vaajtswv tuaj yuav peb ibtug ntxhais kws ntseeg Vaajtswv los tsi pub pe. (saib HKM phoo kaabke rua tshoobkug, nplooj ntawv 41, nqai 4).

### **Phaaj IV: Nyaj Dlejsab Rua Namtxiv Hab Ibtsoom Kevneej Kevtsaav**

- A. Tshoob Tug Pum Tug Qaab
  - 1. Tsi pub muaj nyaj nas tsum muag kev txhum, ca peb ib leeg zaam txim rua ib leeg xwb txhaj lawvle Vaajtswv tug dlejsab.
  - 2. Nyaj ua dlejsab rua namtxiv, kevneej kevtsaav hab nqe tshoob ca yuav lawvle Moob 18 Xeeb lub txhooj, tshwj cov kws cuamtshuam rua kev ntseeg kws peb muab rhu lawm. Yog leejtwg ho ua tau yoojyim dlua le Moob 18 Xeeb lub txhooj los hajyam zoo xwb.
- B. Tshoob Zawj
  - 1. Tsi pub muaj nyaj nas tsum muag kev txhum, ca peb ib leeg zaam txim rua ib leeg xwb txhaj lawvle Vaajtswv tug dlejsab.
  - 2. Tsi pub muaj nyaj fixuv los yog nyaj thoobxu ruaqhov tug ntxhais yeej tseem nyob huv namtxiv tsev.
  - 3. Kev muab tshoob, txawmyog ca rua tug cevlug, nugtij, lossis leejtwg lug muab tshoob los tau, tabsis tsi xob ua kev ua cai, cale muab tshoob ncaaj-ncaaj xwb.

4. Nyaj ua dlejsab rua namtxiv kev ntuag ntxhais hab kevneej kevtsaav, pawg ntseeg pumzoo sau npaumle huvqaab nuav xwb. Yog leejtwg sau tsawg tshaaj los hajyam zoo xwb.

- (i) Nam hab txiv ib leeg \$400
- (ii) Ibtsoom kevneej kevtsaav,  
pujlaug, yawmlaug, namntxawm,  
txivntxawm, nugtij, nugkwv,  
hab kev txwjlaug \$200

5. Thaus pub tshoob lawm, pawg ntseeg pumzoo sau lawvle Moob 18 Xeem lub txhooj kws teev rua huvqaab nuav, tabsis yog leejtwg ho ua tau yoojyim dlua lossis sau tsawg tshaaj los hajyam zoo xwb.

- (i) Nyaj txais tshoob \$100
- (ii) Nqe tshoob \$5,000
- (iii) Noj-haus \$800
- (iv) Txiv khaubtsho \$100
- (v) Nam khaubtsho \$100
- (vi) Pujtsag \$100
- (vii) Yawmtsag \$100
- (viii) Taislaug \$100
- (ix) Nyaj swmtshoob \$60
- (x) Sa sev ib leeg \$100
- (xi) Cheb rooj \$10

(Nce hab nqeg lawvle Moob 18 Xeem lub txhooj thaum ntawd)

6. Lwmyaam nyaj kws Moob 18 Xeem lub txhooj pumzoo sau, tabsis pawg ntseeg tsi pumzoo sau, muaj le nuav:

- (i) Tuam choj tshoob \$200
- (ii) Npua dlaab \$60
- (iii) Tw khee \$20
- (iv) Npauj dlai tis dlai tw \$20
- (v) Qab dlaab \$10
- (vi) Qab suavyaig \$10

### **Phaaj V: Nyaj Tug Mejkoob, Xwbfwb, Lossis Txwjlaug**

A. Rooj tshoob twg yog xwbfwb hab txwjlaug yog cov nrug namtxiv ob tog cev lug, yog namtxiv tog tub xaav muab nyaj dlejsab rua ob tug txwjlaug los tau, ruaqhov ob tug txwjlaug nuav yog ob tug kws nrug namtxiv ob tog leg rooj tshoob txhaj tav.

---

***HMONG AMERICAN ALLIANCE CHURCH***

2515 Maplewood Drive, Maplewood, MN 55109

- B. Rooj tshoob kws muaj mejkoob, namtxiv tog tub xaav ua rooj mov ua Vaajtswv tsaug hab tam mejkoob hab cov tub tshoobkug los tau, ruaqhov mejkoob yuav tau coj namtxiv tog ntxhais cov lug, lug cob rua namtxiv hab luag cuab kwvtij ntawm tog tub. Tabsis rooj mov tam mejkoob nuav namtxiv tog tub npaaj tsi tau los tsi ua lecaag.
- C. Nyaj rua tug xwbfbw kws muab tug tub hab tug ntxhais sistxis huv tuamtsev ib zag yog \$100.00.

## **Phaaj VI: Txheejtxheem Nojhaus Ntawm Rooj Tshoob**

- A. Thaum suavdlawg nojhaus xaus hab yuav tsa qhua sawvkev rov moog tsev, tsi pub muaj xeejxwm luj, tsuas yog siv cov txheejtxheem le huvqaab nuav xwb:
  1. Npaaj ib lub rooj hab txivtxum mejkoob, txivtuam mejkoob ob leeg sispaab moog nqug namtxiv, cov noj nco, hab cov qhua vauv lug nyob rooj yog namtxiv tog ntxhais muaj ntaus nco.
  2. Txivtxum mejkoob tho suavdlawg ib leeg ib poom dlej qaabzib hab coj suavdlawg haus ib lwm dlej. Txivtxum mejkoob le muab lug rua txivtuam mejkoob le nuav:
 

“Has rua koj txivtuam mejkoob tas namtxiv has le nuav: namtxiv yog cov ntseeg, namtxiv yuav tsi muaj ua xeejxwm dllabtsi le, namtxiv yuav ua ncaaj-ncaaj xwb. Namtxiv tom u tuaj txobxeeb tau namtxiv tom nuav ibtug ncejneeg, namtxiv tom nuav tsi has los cuagle yuav has, has los cuagle yuav ntaim ntaim namtxiv tom u. Namtxiv tom u nyajtxag tuaj lawm nqaa naas, tsajtxhu tuaj lawm nqaa nkuaj los namtxiv tom nuav tub u tsi muaj kaab muaj kev, kaujruam lub roob kaujruam lub haav xwb, los has rua namtxiv tom u tsi xob tusab. Has rua koj txivtuam mejkoob, namtxiv has le nuav: txuj hauv hlua muab cob rua namtxiv tsev tom u los txuj qaab hlua namtxiv tsi pum qaab muab cob rua qhovtwg, namtxiv muab cob rua yawmtxoos, namtxiv dlaab, nugtij, tuaj nrug nam nrug txiv saib tub-ntxhais moog uaneej.” (Txhais tau tas cov txheebze nuav yog cov namtxiv ntaus nco rua puab).

Txivtxum mejkoob le qha cov qhualaug rua txivtuam mejkoob hab ua moog ntxiv.

  3. Txivtxum mejkoob le tso lub sijhawm rua cov qhualaug qhuabntuag tug ntxhais hab tug vauv.
  4. Cov qhualaug ntuag meej lawm le tso rua cov namtxiv hab tej txheebze lug ntuag tug ntxhais hab tug vauv.
  5. Thaus suavdlawg tseem ntuag tug ntxhais hab tug vauv, txivtxum mejkoob moog muab tej khoom phijcuam hab tej nraa cob rua txivtuam mejkoob.
  6. Thaus txhua yaam meej lawm suavdlawg tsa lub poom dlej haus kuas meej tes tsa qhua sawvkev moog tsev lawm xwb.

---

***HMONG AMERICAN ALLIANCE CHURCH***

2515 Maplewood Drive, Maplewood, MN 55109

7. Yog namtxiv tog ntxhais muaj cov qhualaug (cov noj nco) es yuav muaj txheejtxeem, tsi pub muaj ntau xeej, tsuas pub muaj plaub xeej le nuav xwb:

*Tshoob Moobleeg*

1. Xeej tog qhua
2. Xeej taw qhua
3. Xeej luamxim
4. Xeej kawm moo,  
cob nraa, sawvkev

*Tshoob Moobdlawb*

1. Xeej tog qhua
2. Xeej mov dlej txag
3. Xeej luamxim
4. Xeej kawm moo,  
cob nraa, sawvkev

**Phaaj VII: Kev Txis Tshoob Huv Tuamtsev**

- A. Nkawm namtxiv kws xwbfbw ua tau kevcai sistxis rua.

Nkawm namtxiv kws xaav kuas xwbfbw ua kevcai txis tshoob hab chob nplhaib huv tuamtsev, pawg ntseeg pumzoo yuav lawvle Hauvpaug Koomhum Moob Qha Txuj Moo Zoo phoo ntawv Kaabke Tshoobkug tau teev tseg ntawm Tshooj 11, nqai (a) txug (h) kws has le huvqaab nuav:

1. Obtug obleeg puavleej muaj noobnyoog lawvle numtswv txujcai;
2. Obtug puavleej ntseeg Vaajtswv;
3. Obtug thov tau dlaim ntawv sisyuav ntawm numtswv lawm;
4. Obtug roojtshoob yog tuaj has huv tsev;
5. Thaus pub tshoob lawm, nraugvauv tsi tau coj nkaujnyaab moog tsev;
6. Tug tub tsi tau nrauj dlua quaspuj hab tug ntxhais tsi tau nrauj dlua quasyawg, txawm nrauj los nwg tsi yog tug txhum;
7. Tug yawmntsuag kws yuav pujntsuag, tug yawmntsuag kws yuav ntxhais hluas, tug tub hluas kws yuav pujntsuag, tug yawmntsuag kws yuav tug pujnrauj kws tsi txhum, tug yawmnrauj kws tsi txhum yuav tug pujnrauj kws tsi txhum, hab tug tub hluas kws yuav tug pujnrauj kws tsi txhum, tabsis yuavtsum yog moog has huv tsev;
8. Nkawm namtxiv twg kws tsi tau ntseeg Vaajtswv, tabsis obtug cale lug ntseeg hab txais yuav Tswv Yexus timntsej timmuag ntawm tug xwbfbw kws yuav ua kevcai ibtxis rua obtug.

Dluale, huv HKM phoo ntawv Kaabke Tshoobkug ntawm tshooj 12, hab tshooj 15 tseem tau teev cov nqai nuav ntxiv hab:

1. Obtug tsi tau nyob uake (cohabitation);
2. Tug tub tsi tau thaam lwmtug hluasnkauj muaj mivnyuas, hab tug ntxhais tsi tau xeeb lwm tug txivneej le mivnyuas (tshwj tug pujntsuag lossis tug pujnrauj kws nwg tsi txhum);
3. Tug ntxhais tsi tau xeeb mivnyuas thaus ua rooj tshoob;

---

***HMONG AMERICAN ALLIANCE CHURCH***

2515 Maplewood Drive, Maplewood, MN 55109

4. Ibtug yuavtsum yog txivneej hab ibtug yuavtsum yog quaspuj.

Tshaaj ntawd lawm, pawg ntseeg yuav tau siv lawvle HKM Rooj Saablaaj Txwm Xyoo xyoo 2010 nyob rua Tampa, Florida, tau pumzoo ob nqai huvqaab nuav ntxiv hab:

1. Thaus tuaj has tshoob, tsi nqaa kaus, tsi tsaab luamyeeb, tsi pe, hab tsi haus cawv
2. Tomqaab ua kevcai txis tshoob huv tuamtsev taag, yuav tsi muaj ua party seevcev (dancing), hab haus beer, haus cawv, tsi has huv tuamtsev lossis lwm qhov chaw.

- B. Dluale tau has lug sau nuav, xwbfbw tseem muaj cai suam npe rua cov ntawv sisyuav lawvle huvqaab nuav.

Pawg ntseeg yuav tau koj lawvle HKM phooj Kaabke Tshoobkug ntawm Tshooj 13 hab 14, ntawm nplooj ntawv 43 kws has le huvqaab nuav:

**Tshooj 13:** Yog nkawm namtxiv kws tub sisyuav uantej lawm tuaj thov xwbfbw suam npe rua obtug dlaim ntawv sisyuav, xwbfbw muaj cai suam, tabsis yuav tau ua lawvle nuav:

- a. Siv sijhawm qhuabntuag obtug txujkev uatxwj uankawm,
- b. Muab obtug sistxis lawv le txujcai huv lub xeev, hab
- c. Obtug yuav tau koj tuabneeg tuaj lossis xwbfbw yuav tau has cov txwjlaug tuaj ua timkhawv txug obtug kev sisyuav.

**Tshooj 14:** Yog obtug kws tsi tau ntseeg Vaajtswv tuaj thov kuas xwbfbw suam npe rua obtug dlaim ntawv sisyuav, xwbfbw muaj cai suam npe, tabsis yuav tau ua lawvle nuav:

- a. Siv sijhawm qhuabntuag obtug txug kev ua txwjnkawm,
- b. Qha Vaajtswv rua obtug,
- c. Muab obtug sistxis lawvle txujcai ntawm lub xeev, hab
- d. Obtug yuav tau koj tuabneeg tuaj ua timkhawv txug obtug kev sisyuav.

### **Phaaj VIII: Tej Yaam Kws Txwv Tsi Pub Muaj**

- A. Nyob rua huv HKM phoo Kaabke Tshoobkug, tshooj 9, tau txwv tsi pub muaj sau nyaj rua cov kws teev huvqaab nuav:

1. Nyaj ntuag ntxhais,
2. Nyaj muag kev txhum,
3. Nyaj khaub tsho rua namtxiv,
4. Nyaj pujtsag, yawmtsag,
5. Nyaj pujlaug, yawmlaug,
6. Nyaj nugtij, nugkwv,
7. Nyaj namntxawm, txivntxawm,
8. Nyaj qhwv taislaug hauvcaug,
9. Nyaj ntaus nco,
10. Nyaj tuam choj tshoob,
11. Nyaj fixuv,

---

***HMONG AMERICAN ALLIANCE CHURCH***

2515 Maplewood Drive, Maplewood, MN 55109

12. Nyaj txais ncej tshoob,
13. Nyaj txais tw txais kee,
14. Nyaj kev txwj kev laug,
15. Nyaj khaib num khaib tswv, hab
16. Nyaj cheb rooj.

B. Txawm lentawd los paab Kaavxwm Tshoobkug rua pawgntseeg kuj pum tau tas muaj ntau yaam nuav kuj tsi cuamtshuam Vaajlugkub hab, yogle ntawd peb pumzoo ca yuav tej yaam le has huvqaab nuav:

1. Nyaj khaubtsho rua nam hab txiv,
2. Nyaj pujtsag, yawmtsag,
3. Nyaj qhwv taislaug hauvcaug,
4. Nyaj ntaus nco,
5. Nyaj fixuv (tshwjxeeb yog tug pum tug qaab, hab
6. Nyaj khaib num khaib tswv.

### **Phaaj IX: Cov Mejkoob Kws Tsa Lug Ntawm Lub Rooj Txwjlaug**

- A. Mejkoob yog lub Rooj Txwjlaug tsa kuas muaj lawvle pawgntseeg phoo kevcai lijchoj ntxiv Phaaj X, Nqai 13, lug paab pawg ntseeg txis tshoobkug rua ibtsoom tswvcuab suavdlawg.
- B. Thaus ibtug lossis ib yim tswvcuab muaj tub yuav muab nyaab lossis muaj ntxhais yuav qua hab thov txug lub Rooj Txwjlaug lawm, lub Rooj Txwjlaug yuav tau tso cov mejkoob kws tau tsa muaj nuav moog paab yim/tug tswvcuab ntawd leg nwg rooj tshoob kuas tav rua nwg.
- C. Txhua tug mejkoob kws raug tsa lug ntawm lub Rooj Txwjlaug yuavtsum tau paub txug pawgntseeg txuj kaabke tshoobkug nuav.

Thov Vaajtswv tug muaj fwjchim hab muaj koobmoov nrug suavdlawg kuas peb ua tau rua peb tug Vaajtswv tau koobmeej.

Revised and adopted on 12/16/12

---

***HMONG AMERICAN ALLIANCE CHURCH***  
2515 Maplewood Drive, Maplewood, MN 55109